

06/09/1998

Pemuda kecam campur tangan luar

KUALA LUMPUR: Pergerakan Pemuda Umno mengecam tindakan pihak luar termasuk Angkatan Belia Islam Malaysia (Abim) yang cuba campur tangan dalam urusan dalaman parti itu berikutan pemecatan Datuk Seri Anwar Ibrahim daripada Kabinet dan Umno.

Pergerakan itu turut membidas segelintir pelajar institusi pengajian tinggi tempatan yang membiarkan diri mereka dengan sewenang-wenangnya diperalatkan pihak tertentu atas nama obor reformasi rakyat yang secara terang menentang kerajaan.

Naib ketuanya, Datuk Hishammuddin Hussein, berkata tindakan Abim mempengaruhi segelintir cendekiawan dan mahasiswa untuk mencapai hasrat mereka adalah liar dan tidak bertanggungjawab.

Malah, katanya, tindakan Abim mengumpul dan membakar semangat mahasiswa dengan menyebarkan maklumat palsu adalah budaya buruk dan membahayakan.

"Saya ingin memberi amaran kepada mereka (Abim) supaya jangan sekali-kali cuba mencampuri urusan rumah tangga kita dan parti kita. Saya juga ingin menasihati mahasiswa supaya tidak mudah terpedaya atas nama gerakan reformasi rakyat.

"Mereka sebaliknya harus matang dan rasional serta meneliti fakta sebelum membuat sebarang keputusan. Ini kerana, tindakan mereka itu jelas mencemar kedudukan sebagai golongan terpelajar," katanya dalam satu kenyataan tiga muka, semalam.

Hishammuddin yang juga Timbalan Menteri Perusahaan Utama, berkata kejadian memaki hamun dan membaling pemimpin negara, terutama Perdana Menteri, Datuk Seri Dr Mahathir Mohamad, sebelum dan selepas mesyuarat Majlis Tertinggi (MT) Khamis lalu, adalah perbuatan biadap, keterlaluan dan tidak bertanggungjawab.

Menurutnya, ini kerana perbuatan mereka yang semuanya anak Melayu amat memalukan dan terang-terang bertentangan dengan budaya dan nilai bangsa yang disanjung selama ini.

"Sehubungan itu, kita menggesa pihak yang bertanggungjawab di institusi pengajian tinggi mengambil tindakan sewajarnya bagi mengelak perbuatan itu berulang," katanya.

Selain itu, Hishammuddin turut menyuarakan sokongan sebahagian besar Exco Pergerakan itu dan Ketua Pemuda Bahagian untuk terus berdiri bersama-sama kepimpinan Dr Mahathir sebagai presiden parti dalam menangani isu pelucutan jawatan Anwar.

Menurutnya, mereka memberi kepercayaan kepada MT berhubung isu itu dan yakin badan parti itu sudah menimbang keputusan itu dengan teliti dan bijaksana demi menjaga kepentingan parti dan negara.

"Sebagai ahli Umno yang bertanggungjawab, matang, rasional dan waras, kita yakin Umno yang mempunyai sejarahnya tersendiri akan dapat menyelesaikan perkara itu dengan caranya sendiri.

"Sebagai ahli Umno juga kita dituntut menghormati kepimpinan parti. Sekarang, ketaatan dan kesetiaan kita diuji. Justeru, kita harus sentiasa mengutamakan kepentingan parti daripada individu dan hanya parti yang kukuh dan bersatu padu dapat menjamin kesinambungan perjuangan agama, bangsa dan negara," katanya.

(END)